

Expression : e besonh !

- *Vam mair, e pòdes tostamps pujar los escalèrs ?*
- *Oc e besonh !*

Un dusau exemple :

- *E l'esquia que va mièlher ?*
- *Oc e besonh !*

E besonh qu'ahorteish l'afirmacion en har comprèner a l'interlocutor de qu'ei ua necessitat.

Qu'ei ua família qui se'n veden entà juntar. Lo pair qu'a perdut lo son tribalh e qu'a calut har dossièrs entà tocar allocacions qui tardan...

- *Vam, per la fin, avetz tocat lo caumatge ?*
- *Oc e besonh !*

Ací lo **e** non sembla pas estar un enonciatiu. Lhèn aqueth **e besonh** ei ua simplificacion de l'expression que hè **de besonh** ? Çò de segur qu'ei un sinonime popular de **urosament**.

Numeraus còps que i a imprecís : dus, duas...quate

- *E lo casau quin l'as ?*
- *N'i tribalhi pas guaire mei mes que volerí totun har **duas** tomatas e **dus** pipèrs !*

Ací lo **dus, duas** que vòu díser *quauques, quauquas*. Que pòt estar **dus** segur mes lo mei sovent que serà drin mei : quate o cinc.

Tà díser precisament **dus, duas** que's pòt emplegar un par :

As vist aqueth par de gojatas si son beròias !

Lo mei sovent **quate** que serà mei :

*Augan qu'avem avut hèra de pomas. Que ve'n vau balhar **quate**.*

Que pòt estar un detzenat... o dus quilòs parièr !

Que sia entà **dus** o entà **quate** qu'ei ua faïçon tau qui balha de prepausar chic e de n'auherir mei ... çò qui dobla lo plaser deu qui receu !

Entà clavar, disem que los numeraus e son emplegats entà marcar un nombre precís. Totun, entà **dus** e **quate**, segon lo contèxte, que pòt estar un nombre mei gran.

Pronoms personaus : desbrombà's...

Tres exemples basics... e aisits :

Que s'a desbrombat lo paraploja.

Que m'èi desbrombat lo còde de la pòrta d'entrada.

Que v'avetz desbrombat de'm balhar la clau.

Mes a còps qu'avem construccions mei complicadas :

Que se m'èi desbrombat de t'ac díser.

Non t'ac desbrombaràs pas !

Dens la construccion pronominal, lo pronom personau conjunt que marca l'investiment deu subjècte dens l'accion.

Medecina populara : lo batedit (panarís).

Que cau har borir aiga dab drin de sau e trempar lo dit nau còps. Quan ei madur que'u crèban dab ua agulha (dit – e òc !- peu pair).

Que vederam que pro sovent, en lo rituai de las recèptas popularas, qu'avem la chifra nau qui trobam tanben en las cantas tradicionaus qui aperam cantas de nau.